

կեանքի և գոյքի կտտարեալ անապահովութիւն: Յափշտակութիւնները, թալաններն ու սպանութիւններն այլևս սովորական երևոյթ են դարձել: Աւագակների յանդգնութիւնն անցել է ամեն չափ ու սահման և ստացել տարրերային բընոյթ: Նրանք գործում են զինւած, կազմակերպւած, խիզախ, յափշտակելով, կողոպտելով: Ամեն ինչ ենթարկւած է աւագակների թալանին. մի խօսքով կտտարեալ անարխիա է տիրում շրջանումս, որին վերջ տալու համար անգոր է զգում իրեն տեղական կառավարական իշխանութիւնը. և արդէն քանիցս նրա ուղարկած զօրքերը փախուստի են ենթարկւել: Աւագակները խրախուսւած իրենց յաջողութիւններից, այսօր սիստեմատիկ կերպով առաջ են տանում իրենց սխրագործութիւններ, թալաններն ու բռնութիւնները: Նրանցից նշանաւորներն են Ռէզաւ Չարլանգ խաները, Մուգուի խաջէն և Ալէքսի Մանուկեան (Կրախտակցի), որոնք իրենց զինւած խմբերով ազատ, համարձակ լեռներից ու ձորերից գիւղերն են իջնում, թալանում, կողոպտում, հարստահարում և նորից լեռներն են քաշւում, ճանապարհներին երթևեկող գիւղացիներին կողոպտելու համար: Սրանք յարձակւում են կարաւանների վրայ, կտրում ճանապարհների առաջը և ամեն ինչ աւարի են տալիս: Այսպէս ամենուրեք այլան-թալան, սպանութիւն և կեանքի, գոյքի անապահովութիւն: Գիւղացիութիւնն ահաբեկւած է, նա չի կարողանում քաղաք փոխադրել ցորեն, գարի, ալիւր ճանապարհների անապահովութեան պատճառով: Նա մնացել է անտէր ու անօգնական և օրըստօրէ աւագակների ճիրանների տակ հիւժւում և արիւնաքամ է լինում:

Հաղորդակցութեան եւ փոխադրութեան միջոցներ: Այս գաւառում ճանապարհորդելը և ապրանքներ ու մթերքներ փոխադրելը կապւած է բազմաթիւ դժւարութիւնների և սարսափելի նեղութիւնների հետ: Ամբողջ գաւառում ոչ հեռագիր կայ և ոչ էլ պոստ: Այստեղ դու չես գտնել նոյնիսկ էթանագին կառքեր, ձի կամ ջորի. առանձնապէս կառք, ձի կամ ջորի վարձելը թէ դժւար է և թէ անասելի թանգ: